

## صورة صادقة



الواحات..

أرض طاهرة

فيها نخلة ... جنب بير

تمرة حلوة

والعجينة بدم ناسها

طعم خير

صوت آدانها

ومن حنانها

القلب يفرح زي طير

فطرة لسه فيها روح

من بواقي الطيبين

فيها ناس لساها صاحبة

تروي حُب

وترمي حَب

طرحه باين ع الجبين

الأصول اللي نسيناها

لسه باقية

زي ساقية

لما تسقي العطشانين

الكرم لساها بيحلف

إن دولا من زمان

والسماحة ف أرض واحة

ريحة أحلى من الريحان

والضيافة بجودة عالية

تحضنك ويّا المكان

لموا صوتهم...

مين يرحّب مين يقابل

مين يقدم

الصدر دي فيها ضحكة

وابتسامة لما تيجي عليك تسلم

القلوب لون الحليب

باب بيفتح للغريب

جاي يساعد أو يعلم

ناس بتسعى سعي خالص

من سكات

للي جاي بخير يساعد

جاي رحلة

طولها أطول م الساعات  
والحكايه باختصار  
روح وشوفها في الواحات  
والواحات...  
ضامّة ناسها  
ورافعه راسها  
زي مادنة تقيم آدان  
صوت يخبّط  
إيد تطبب بالطيابة  
تتفتح كل البيان  
ع الحبايب والجيران  
لسه فيهم ريحة فايحة  
من الصحابة

بالعمل ويا الإيمان

صورة واضحة زي شمس

بتنتفض.. تجري السحابة

حاجة تفرح لو تشوفهم

صف واحد في المساجد

والسجود ع الوشّ بان

أرض بكر وناسها نخل

بيهدي تمر

نية صافية

بألف عافية...

واقفه شامخة كالجبال

فيها عزم وفيها صبر

ناس تشوفهم في الحقيقة

حاجة تشبه للجمال

أهل تقوى وأهل برّ

ودم حُرّ...

شد حيله.. نهاره ليله

حاجة تشبه للخيال

في الخيال الرمل أخضر

روح بتقدر...

تبتسم لك زي حضن الأمسيات

والحكاوي تلمّ حلمك

يصحى قلمك

لما يكتب شئ يهملك

لما يرسم...

صورة صادقة للواحات